



Najukkani innuttaasunik kiisalu takornarianik nunanit allaneersunik suliarinninnissamut pisussaaffik naammassisinnaaniarlugu takornariat amerlanerpaaffianni Kalaallit Nunaanni peqqinnissaqarfimmi peqqinnissakkut sulinneqarnermi ikiorserneqartarnissamik aaqqissuulluakkamik isumaqatigiissuteqarnissaq siunertaralugu nunarsuarmi peqqinnissakkut suliniaqatigiiffissuarmut, WHO-mut, attaveqarnissamut Naalackersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Anna Wangenheim, Demokraatit)

(Siullermeerneqarnera)

Qujanaq Demokraatit Inatsisartuni ilaasortaaitaannut Anna Wangenheim-imut siunnersuummut uunga pitsaasumut.

Maani nunatsinni malugereerparput takornarissat malunnartumik amerlisut, aammalu amerlinerunissaat ilimanarluinnarluni, mittarfissuit nutaat tamarmik atulerpata. Takornarissat amerlineri aningaasaqarniarnitsinnut pitsaasuupput siunissamilu pigissarnissatsinnut inuulluataarnissatsinnullu annertuumik tapertaasussaallutik.

Takornarissalli amerlanerisa aamma kingunerissavaa, peqqinnissaqarfitta suli tatisimaneqarnerulernera. Tassunga atatillugu pingaartuuvoq, qulakkiissagatsigu, takornarissat minnerunngitsumillu uagut nammineq innuttagut pitsaasumik peqqissutsikkut sullinneqarnissaat, pisariaqartitsiffimmini. Tamannalu ilimanareerluni takornarissat amerlineranni immikkut ittumik unamminartuussasoq.

Siumut isigaluni siunnersuut una Inatsisartunut ilaasortamit Anna Wangenheim-imit siunertaqarpoq qulakkiissallugu, nunatsinni Peqqinnissaqarfiup takornarissat amerlanerpaaffimmiinneranni artornagit sullissisinaanera nunaqavissunut peqqissutsimut tunniunneqarsinnaasunut pisariaqartitaannut killililersuutaanngitsumik.

Siunnersuut assersuutissatsialaavoq, qanoq uagut nunatut nunani tamalaani sullissisunut suleqatigiinnermut iluaqtissatsinnik aallernissamut pitsaanerulersinnaasugut uani pineqarluni Naalagaaffiit Peqatigiit peqqissuunissaq pillugu suleqatigiiffianik (WHO). WHO nunarsuaq tamakkerlugu misilittagaqarlunilu piginnaasaqarpoq peqqinnissaqarfitsinnut nukittorsaataasinnaasunik piffissani, pisariaqartitsinerpaaffitsinni. WHO-mik isumaqatigiissuteqarnerup takornariaannanut peqqissutsikkut tunniussinnaasat pitsanngorsaannassanngilai, aammali qulakkiissallugu, nunaqavissut kipisaqattaanngitsumik peqqissutsimut pisariaqartitanik atuisinnaanissaat. Tamanna alloriarneq pingaartorujussuaq peqqinnissaqarfimmik nukittuumik aalaakkaasumillu pilersitsinissamik, siunissami unammilligassanik nammassinnaasoq.



Pingaaruteqarluinnarpoq, uagut nunatut minnerpaaffiatigut upalungaarsimanissaq qulakkeersinnaaneripput piffissani takornariarpassuaqarnerani, Demokraatinilu isumaqarpugut, WHO-mut isumaqatigiissuteqarneq sinissatsinnut amomgaasaliinerusoq. Aaqqiineruvoq, qulakkeerinnittoq, peqqinnissaqarfitta takornariaqarnerup annertusigaluttuinnarneranut malinnaasinnaaneranik taamatullu aamma innuttaasut peqqinnissamut atugarissaarnissaannullu illersuisuussalluni.

Inatsisartunut ilaasortaq Anna Wangenheim annertuumik nersortariaqarpoq isumut isiginnittaaseqarnermigut tunniusimanermigullu qulakkeerusummagu, uagut nunatut siunissami nukittuumik inissisimanissarput. Aalajangiisartutut pisussaaffigaarput qulakkiissallugu, peqqinnissaqarfitta siunissami unammilligassanut piareersimanissaq, WHO-millu suleqateqarnissaq aaqqiinissamut annertuumik aqutissiuussisussatut isigalutigu.

Tamanna tunngavigalugu siunnersuutip akuerineqarnissaa innersuussutigineqarpoq Ilaqutariinnut- aamma Peqqissutsimut ataatsimiititaliami suliareqqitassanngorlugu innersuunneqarluni.